


Cugl trainer ainten scola



Jeans cun rosas, tshots da trainer e hot-pants: la gardaroba da juvenilas e juvenils ainten scolas superiouras procura per controversas e discussiuns. Tge è lubia e tge betg? E scu tractan las scolas superiouras an Surmeir la moda da lour scolaras e scolars? La FMR ò discurreia cugls manaders da scolas.

Sandra Balzer/FMR

Tge tgi pertotga la «moda» e maniera scu tgi scolaras e scolars cumparan ainten l'instrucziun da scola ò do da discutir igl davos taimp. Cunzont en artetgel aint igl urden da scola dalla scola secundara da Muttenz a Basilea-Campagna ò procuro chest aton per discussiuns. Las scolaras ed igls scolars vegian da cumpareir an vistgadeira adequata. Vot deir: nigns hot-

pants, betg mussar igl vainter, nignas stgavladeiras e las tgotschas digls mattatschs noua tg'ellas totgan.

Tgotschas da trainer – duple tgi angal sport

Las tgotschas da trainer – ellas èn trend, cumadevlas e practicas. Ma totgan ellas er an stanza da scola? Alla scola da Lai è vistgadeira sportiva usit, scu tg'igl manader da scola *Stefan Langenegger* ò detg anvers la FMR: «Nous vagn differentas scolaras e scolars tgi vignan sur la loipa a scola ni tgi fon sport sur mezde. E sch'igls unfants reivan cugl vistgia da skis ègl cler, tg'els on aint en trainer sotaint.» Tenor igl manader da scola dallas scolas an Val Alvra *Damian Dosch*, en utensil tgi totga an amprensa lengia ainten sala da gimnastica. «Cunzont sch'igls scolars e las scolaras on sivo è chegl ena dumonda dalla higiena», dei *Damian Dosch*.

La vistgadeira da singulas scolaras e scolars ò do da discutir tranter la magi-straglia a Casti uscheia tg'ins ò elaboro ena recumandaziun per giuvenils e genitours. Sper en'illustraziun tgi fò attent tge tgi totga e tge betg declera igl text accumpagnond: «La vistgadeira exprima l'individualitad ed è percheigl sot igl schurmetg dalla libertad persunala. Chegl vala er per unfants e giuvenils. Percheigl tgi la scola è en li da lavour, definagn nous standards minimals, tgi sa distinguan da chels digl taimp liber. Ultra da chegl lagn nous evitar tgi vistgadeira cnappa detta en messadi sbaglea.»

Mussar pel

Tgi cunzont giuvenils mossan tranteraint mengia blera pel ins canoscha tant a Casti scu er a Savognin. I sa tracta pero da singuls cass, scu tg'igl manader dalla scola da Surses *Jörg Bühler* ò detg anvers la FMR: «Chellas mattatschas cun tgotschas mengia curtas ins ò fatg attent sot quatter îgls. Vasia sur en pêr onns sa tractigl pero da singuls cass. La gardaroba dallas scolaras e digls scolars è en tema tgi vagn bagn er gio discuto, ma an general betg uscheia, tgi vessans da far ena lescha.»

La scolasta secundaria *Saskia Willisch* a Casti benevainta la recumandaziun alla sia scola: «Ia cat chegl ena bunga tgossa. Igl è ena varianta neutrala per deir tge trer aint e tge betg, percheigl tgi dat singulas scolaras tgi mossan mengia blera pel. Per part è chegl ena tgossa tgi provotgescha ed igl è da disfrantzter tranter scola e taimp liber.»

Preparaziun per pi tard

Igl manader da scola da Muttenz ò accentuo ainten en'intervista anvers SRF tg'ins spetga, tgi las scolaras ed igls scolars seian vistgias uscheia scu tg'els geian pi tard er alla lavour. Ainten ena brev agls manaders da scolas ò la direc-ziun d'educaziun da Basilea-Campagna admonia, tgi urdens da vistgadeira seian, ord vista giuridica, lubias angal per part.

Igls genitours èn responsabels

La lescha è clera: tenor codesch civil èn igls genitours responsabels d'edutgier lour infant conform allas circumstanzas e da promover e proteger igl svilup corporal, mental e moral. Per la vistgadeira èn alla fegn finala responsabels igls genitours. Ord vista giuridica ègl grev dad applitgier prescripziuns rigorasas an scolas. «Tge tgi perto-tga vistgadeira tgi glorifitgescha violenza, sexissem u rassissem ins ò igl dretg da scumandar e per tala vistgadeira na vainsa er nigna toleranza», accentuescha *Damian Dosch*. Per evitar da derasar malsognas po la scola prescreiver da trer aint scalfigns. En punct tgi è digl reminent er preschaint aint igl urden da disciplina dalla scola Surses. Ainten tot igls oters cass ins tschertga a Lai, a Casti ed a Savognin igl ampren igl discurs cugl singul giuvenil u alla fegn finala cugls genitours.